



GOBIERNO DI ARUBA

# ISLA ONLINE



Diaranson 8 January 2020

Email: [prensa@arubagovernment.aw](mailto:prensa@arubagovernment.aw) Tel: 528-4900



## ISLA ONLINE

JANUARI 2020

UN ISLA  
UN DECADA NOBO



**MINISTER EVELYN WEVER-CROES**

**PROME MINISTER DI ARUBA**



**Prome Minister Evelyn Wever-Croes:**

## **DISCURSO DI FIN DI AÑA DI PROME MINISTER EVELYN WEVER-CROES**

**Lagando 2019 atras cu logronan grandi pa nos pais, nos ta drenta un decada cu lo pone Aruba riba e rumbo positivo na forma structural y sostenible**

“Conciudadanonan, e aña 2019 ta yegando su final, y un aña nobo ta drentando. Y esaki lo no ta un aña nobo simplemente, sino un decada nobo. Prome cu tira un bista riba locual tin nos dilanti, permiti mi relflecciona riba e aña cu ta cabando.

2019 tabata un aña cu varios reto, algun reto hopi serio. Aña 2019 ta e Aña di Famia y Cuido di Nos Muchanan, den cual nos a pone e ser humano central. Nos ta realisa cu pa por haci esaki mester atende cu diferente reto.

### **RETONAN**

E retonan financiero di nos pais a predomina durante henter aña, cu menasa di aanwijing varios biaha riba agenda di Rijksministerraad. Nos a percura pa atende cu e retonan, y demostra cu nos sa kico nos ta haciendo y cu nos ta serio den resolve e problemanan financiero di nos pais. Nos a percura pa cumpli cu e maneho financiero manera palabra, nos a percura pa keda dentro di e margen di presupuesto cu Parlamento a duna nos. 5 aña pasa ainda e deficit tawata 444 miyon. E aña aki nos a sera aña na un deficit di 4 miyon florin.

Nos a percura pa e gastonan di personal y demas gastonan a baha, y nos a percura pa esnan cu mester a paga impuesto,

paga loke nan debe. Nos a traha e presupuesto pa otro aña cu un surplus di 25 miyon florin. Nos a cera aña cu un debe di 77% di GDP.

Nos a logra esaki cu un maneho prudente y consistente, cu decisionnan responsabel, haciendo un apelacion tambe riba nos companianan estatal pa duna nan parti na yuda saca nos pais di e problemanan financiero.

Y principalmente nos por a logra esaki debi na e sacrificio conhunto di henter comunidad di Aruba. No tabata facil, pasobra e debe grandi di nos pais a causa hopi dolor, e ta causante di e economia cu a stagna, di e desempleo, di inflacion cu a subi, di falta di confiansa di inversionistanan den Aruba. Y no ta husto cu ta pueblo mester paga pa e debe cu un maneho irresponsabel a ocasiona. Pero pa salba Aruba, ta nos tur mester a hala cerca y hala faha mara, sin importa ken a crea e debe, pasobra nos si ta stima Aruba.

Un cos si, nunca lubida e sacrificio cu conhuntamente nos a haci e dos añanan aki y cu ainda nos mester haci, pa pone Aruba bek riba e rumbo positivo, pasobra nos mester percura cu e mal maneho cu a causa e dolornan financiero, e desempleo, e economia stagna, e inflacion, nunca bolbe bek.



## Continuacion Pagina 2

Danki na e sacrificio di henter nos comunidad y dialogo constante cu institutonan internacional y Gobierno Hulandes, IMF y S&P a duna Aruba review positivo, nos a logra evita un aanwijzing e aña aki, cual a trece tranquilidad atrobe den nos comunidad, y a permiti nos concentra riba otro retonan.

Economia di nos pais ta creciendo, debi cu turismo ta creciendo tanto den cantidad di turista, como e placa cu nan ta gasta ora nan ta aki. Aruba keto bay ta atrae hopi hende pa bin pasa vakantie, danki na nos bunita playanan, nos naturalesa, y especialmente nos hendenan. Esaki nos mester cuida. Por mira tambe cu e interes pa inverti den e sector di turismo ta grandi. Pa prome biaha nos a mira interes y inversion importante den e area di San Nicolas, inversion den un hotel, y e proyecto di Boardwalk na Baby Beach, pa asina nos por reparti desaroyo riba henter nos isla, pa tur ciudadano. Den 2019 nos a yama bon bini na Hyatt Place na airport, Boardwalk y na Courtyard Marriott. Y pa 2020 nos ta ricibi Secrets, St Regis y Radison Blu.

Nos a publica e vision economico 2019-2021 cu ta concentra riba 6 sector prometedor, diversificacion di turismo, economia di conocimiento, logistica, agricultura, economia circular y industria creativo, y asina crea un desaroyo sostenible den nos pais, y nos a cuminsa traha riba baha e burocracia, e red tape, y baha e 'cost of doing business'.

Nos a amplia e fleta di bus pa mehora transporte publico.

Desempleo di nos pais a baha y mas ciudadano a haya trabou. Gabinete Wever-Croes no ta duna "onthefing" mas, y asina ta percura pa esnan cu ta desemplea haya trabou prome.

Aña 2019, e Aña di Famia y Cuido di Nos Muchanan, nos a pone hopi enfasis riba e retonan social a traves di e 31 proyectonan den e Crisisplan Social, cu e meta pa brinda mas proteccion y oportunidad na esnan mas vulnerable den nos comunidad. Tambe nos a enfoca den crea mas facilidad deportivo pa brinda nos hobennan recreacion sano.

E seguridad di nos ciudadanonan ta nos prioridad y pa enfrenta e

retonan aki nos a cumpli cu e compromiso di trece e helicopter y radarnan bek.

E reto di scarcedad di vivienda tambe a haya atencion. Nos a pone prioridad, en bes di e negoshi di tereno cu tawatin den pasado, pa na atende cu tur peticion pa tereno cu desde 2009 no a wordo contesta. Nos meta ta pa otorga tereno na famianan pa nan construi nan propio cas, pasobra cada famia merece di tin nan propio hogar.

E impacto di e crisis di Venezuela den nos pais ta grandi, y nos lucha constante ta pa e no afecta calidad di bida di nos ciudadanonan. E peso ta grandi, y ta Aruba mes ta cargando cu tur e peso financiero di e crisis. Nos ta convivi cu e situacion na Venezuela, pero nos tin cu pensa riba Aruba awor, y p'esey nos a cera e frontera cu Venezuela na mei y manten'e cera, mientras nos ta atende cu e efectonan di e crisis den nos pais, respetando derechonan humano di tur hende.

## INNOVACION

E retonan den 2019 tabata grandi, pero nos a haci tur esfuerzo pa no enfoca riba e retonan so. Mientras cu nos tabata enfrenta tur e retonan, mes momento nos tabata enfoca riba futuro, a traves di Innovacion. Nos ta preparando nos futuro generacionnan pa e retonan di futuro. Cosnan ta cambiando lihe, mas cu mitar di muchanan cu awe ta bay scol basico lo traha den trabounan cu awe no ta ni existi. Y nos compromiso ta pa prepara nan pa e retonan ey. Un proyecto cu mi ta hopi orguyoso di dje ta e proyecto piloto di digitalisacion di scol basico Cacique Macuarima y scol preparatorio Aterima. Klasnan a haya bordchi digital, C-touch, nan a haya computer y laptops, nan a haya airco, y nan ta haya lesnan for di computer. Mas y mas scol ta mirando avansenan den innovacion, preparando nos muchanan pa un futuro sigur.

Nos a pone e fundeshi pa e-Government, y lo sigui construi riba e fundeshi aki den futuro. e-Government lo percura pa mas eficiencia den gobierno, pa miho servicio na ciudadanonan y pa mas transparencia den procesonan administrative y pues menos corrupcion.

**Continuacion Pagina 3****ALIVIO PA COMUNIDAD**

Lo tawata hopi facil mirando tur e retonan den e aña aki, pa a concentra solamente riba nan, riba saca Aruba for di e crisis financiero. Pero pa Gabinete Wever-Croes tawata hopi importante pa mes momento busca forma pa duna alivio awor caba y no pa warda te ora nos soluciona e problemanan financiero.

Nos a habri aña cu rebaho di impuesto riba entrada pa 25 mil ciudadano y 30 mil hende cu no ta paga esey mas y nos a cera aña, cu anuncio cu lo bolbe rebaha esaki entrante comienso di 2020. Tambe a rebaha e tarifa di grondbelasting y 12 mil persona lo no paga esaki mas.

Pa pensionadonan, aparte di baha e tarifa di impuesto riba pensioen, a aumenta pensioen entrante 1 di januari 2019 y lo bolbe aumente entrante 1 di januari 2020. Tambe a baha e prima di AZV y a aumenta e reparatie toeslag.

**2020**

E bon noticianan aki ta crea speransa, ta trece optimism. Y cu e optimismo aki nos ta drenta un aña nobo. Un aña cu sin duda lo tin su retonan, pero e lo ta un aña tambe di recuperacion y oportunidadnan nobo. Aña di Innovacion y Enseñansa.

Economia y turismo lo crece den 2020 y inflacion lo baha den 2020, segun estudio di IMF y Banco Central.

E cambio mas grandi ta cu den 2020 porfin nos por genera entrada di e refineria y e terminal atrobe, mirando cu nos ta terminando e contract cu Citgo y nos por busca un operador nobo entre tur esnan cu a demostra nan interes.

Tur esaki lo genera cupo di trabou pa nos mama y tatanan di famia.

Finanzas publico lo sigui mehora den 2020, y e peso di tur e impuestonan lo bira menos. E debe di pais Aruba lo sigui baha, Ademas cu nos lo sigui busca otro forma di entrada pa Gobierno.

Innovacion lo ta e linea cora den maneho di cada ministerio pa soluciona e retonan cu nos encontra. Creando asina mas transparencia pa sigui combati corrupcion.

Na 2017, ora nos a tuma over gobernacion, nos a subi un trein cu tabata bayendo cu velocidad hopi halto den direccion robes, direccion di mal maneho financiero, direccion di corrupcion. Nos a dicidi di cambia e rumbo ey, cu urgencia, pa hiba e trein den direccion positivo. Pero nos no por a cambia e rumbo lihe, ni facilmente. nos mester a tuma un bocht grandi. Y e no tabata facil, pero nos a haci'e si. Nos no a sali di e bocht ainda, pero e peor ta tras di lomba. Nos no a yega ainda caminda cu nos mester ta. Den apenas 2 aña di gobernacion ta imposible pa por a coregi e rumbo di e 8 añanan anterior pero nos ta riba e bon caminda.

Y nos ta drenta e aña nobo, e aña di innovacion y enseñansa, cu optimismo y positivismo, cu fe y confiansa cu nos lo logra. Pa asina crea e fundeshi pa e decada nobo. Un decada cu lo pone Aruba riba e rumbo positivo na forma structural y sostenible.

Mi deseo ta cu e aña nobo trece pa cada ciudadano di nos pais, oportunidadnan nobo, progreso y bienestar.

Mi kier gradici cada un di boso pa e sosten y apoyo cu mi a ricibi den 2019, tur e consehonan, critica constructivo, bon deseonan y oracionnan. Mi ta spera di por sigui conta riba e sosten y apoyo den e aña nos dilanti. Un bon y prospero aña 2020. Cu Dios bendiciona cada ciudadano di nos pais.

A aumenta minimumloon na mei y cerando aña a anuncia un siguiente aumento entrante 1 di januari.

Pa compensa e perdida di poder di compra debi na inflacion, Gabinete Wever-Croes a dicidi di baha e tarifa di Impuesto entrante 1 di januari 2020.

Y cerando aña, e miho noticia di tur, e rebaho di tarifa di coriente entrante 1 di januari 2020, cu 10% pa residencia, 9% pa fundacion y scolnan y 7% pa comercio. Pa cada cas di famia esaki ta ekivalente cu full un luna gratis di coriente. Den corto den 2019 nos a hiba un maneho mas prudente y den e espacio limita cu nos tawata tin semper nos a pone e ser humano central. Ta asina nos a logra pa mientras nos ta solucionando tur e problemanan di nos pais, pa duna alivio na nos ciudadanonan.

**CLAUSURA**



2020

# AÑA DI INNOVACION Y ENSEÑANSA



GOBIERNO DI ARUBA

Gobierno kier dal e pasonan concreto den inovacion y educacion pa modernisa, fortalece y capacita nos como pais pa e retonan actual y di futuro.

Innovacion lo ta e linea cora den maneho di cada ministerio pa soluciona e retonan cu nos encontra. Creando asina mas transparencia pa sigui combati corrupcion

Nos ta pensa riba inovacion den tur sentido di palabra. Innovacion economico, inovacion social, inovacion den salud, inovacion den nos leynan, inovacion den sector primario y principalmente inovacion den **enseñansa**.





**MINISTER XIOMARA RUIZ-MADURO**

MINISTER di Finansa, Asuntonan Economico y Cultura



## FUNDACION CINEARUBA TA INVITA COMUNIDAD PA BIN WAK Y VOTA PA E PELICULA FAVORITO DI PUBLICO

Diahuebs awor Fundacion CINEARUBA lo presenta 'Shortcutz Amsterdam International Audience Award.' E evento lo inicia 8'or di anochi y e lo tuma luga na Baz-rrr Galleria y Brasserie den centro di ciudad na Emma Straat 3. Durante e evento e publico lo por disfruta di shete pelicanan cortico cu ta compitiendo pa e premio di e pelicula favorito di publico. Despues di e presentacion e publico presente lo vota pa nan pelicula favorito.

Shortcutz Amsterdam ta forma parti di e mes un network cu Shortcutz Aruba.

Manera tur aña e premio publico di Shortcutz Amsterdam ta wordo dicidi door di e publico di diferente pais. Un total di 28 ciudad perteneciente na 15 pais ta participando entre otro Hong Kong, Angola, Italia, Brazil y Inglatera. Tur e pelicanan cu lo wordo presenta durante e anochi di diahuebs lo tin subtítulo na Ingles. Entrada na e evento lo ta completamente gratis. Pa mas informacion por bishita e pagina di Facebook di CINEARUBA.





# Minister Maduro di Cultura: EDJEAN SEMELEER A RICIBI UN RECONOCIMIENTO PA SU APORTE NA CULTURA DI ARUBA

Durante e conocido show 'Hey ta Pasco' di Edjean Semeleer na Ser'i Noka, Minister di Cultura sra. Xiomara Maduro a sorpresa Edjean cu un reconocimiento pa su gran aporte na Cultura di nos Pais. Edjean tin un trayectoria artistico di 25 aña largo. Ya for di e edad di 3 aña Edjean a cuminsa duna mini concierto pa famia, a participa den Voz-I-Landia, a graba disco compacto y ta organisa concierto pa fin di aña. Edjean a sa di gana un gran cantidad di premio y a ricibi varios reconocimiento entre nan 'Premio Mo Tito y Rufo Wever,' 'Den Ambiente Awards,' 'Premio Cultural/Persona di Aña,' varios biaha ganador di 'Un Canto di Himno y Bandera,' y Edjean tabata varios biaha Rey di Dande.

E reconocimiento di Edjean a haya un bunita contenido na momento cu Edjean a invita Minister Maduro pa canta hunto e clasico 'Cunucu di Seit.' Tabata un momento sigur historico na unda cu e mandatario na un forma spontaneo a transmiti e aprecio y sosten cu nos Pueblo tin pa Edjean como un artista Arubiano cu ta laga Pueblo biba nos cultura.

Minister Maduro di Cultura den nomber di Gobierno di Aruba ta felicita Edjean pa su 25 aniversario artistico ta gradici'e pa su aporte na e herencia cultural di nos Pais.





# CASO DI MANGEL HATO TIN DIP SU ATENCION Y A ACTUA DEBIDAMENTE PA RESOLVE E INCERTIDUMBRE CU TA REINA ENTRE HABITANTENAN

Pa locual ta trata e caso di Mangel Halto, departamento di DIP a ricibi basta reaccion riba rednan social na unda cu varios persona a expresa nan malcontento. Como DIP, nos a tuma paso di biaha y a reuni inmediatamente cu DOW y DNM diamars ultimo. Analizando e raport, a constata cu DIP a hiba un combersacion cu e doño di e lugar, y alcambio DIP a wordo informa di parti e doño, cu nan ningun momento su interes ta pa tuma e lugar over.

Tur loke su persona a haci, ta un limpieza na sitio, mirando tur e sushi cu ta keda atras den oranan di anochi, cu sigur no ta un bista agradabel pa un y tur. Mester menciona cu su bon intencion no a cay den bon tera cerca publico, pasobra e prome impresion ta ilustra cu e kier tuma e beach over y haci esaki uno priva.

Como DIP a splica cu nos tin un ROP / ROPV cu full e sitio aki ta cay den natuur gebied. Esaki ta trece cune, cu full e lugar mester ta liber y acesibel pa tur hende, y mester wordo beperk pa ontwikkeling. No ta asina cu bo por haci locual cu bo kier eyriba. Abase di e informacionan ricibi, nos a informa e persona via un carta cu no ta asina su persona por haci locual cu e kier riba un domeinground.

Alaves nos a informa e persona segun nos ley di naturalesa, cu e no ta permiti pa pone aparatonan di BBQ y algun cos mas. E doño a informa DIP cu e ta compronde, y el lo kita tur cos cu el a pone riba e sitio, y lo percura pa e keda habri acesibel pa tur hende. DIP a informe cu e tin te cu diabierna pa kita tur cos, y si e no cumpli, DIP y e varios departamentonan lo actua y kita tur cos cu no ta permisibel riba e lugar.

Un otro situacion cu DIP a constata na momento cu nos cuminsa actua contra irregularidadnan, nos ta haya varios persona ta bisa nos, cu nan ta bezig ta haci nan lugar limpi, y tur biaha ta bin padilanti cu ta nos pueblo ta susha e lugarnan, entre otro boter, resto di cuminda y mucho mas ta keda atras.

Ta importante pa menciona como DIP cu tin e responsabilidad pa mantene e partinan publico acesibel mas hopi cu ta posibel pa niun hende no tuma e propiedad bou di nan poder, pero nos ta pidi comunidad tambe pa contribui na limpieza di e lugarnan na momento cu bishita cierto lugarnan riba nos isla.

Tur hende ta desea na momento cu nan bishita un sitio, cu esaki ta limpi pa nos por sigui cuida nos medio ambiente. Por ultimo, DIP ta haci un suplica pa locual ta trata e tereno na Mangel Halto cu ta un tereno habri pa un y tur, y a palabra cu e doño cu esaki ta keda habri, pero tene cuenta si cu tin

reglanan, y un di e reglanan ta, si bo visita un natuurgebied, y bo aplica e ROP / ROPV, bo ta constata cu ta prohibi pa un vehiculo di motor para eyriba, y asina tin mucho mas.

DIP ta compronde ambos banda di medaya, y ta pesey ta boga na comunidad pa nos respeta nos leynan, pero alaves cuminsa mantene nos lugarnan limpi.

Ley ta bisa claramente, cu bo por bin cu materialnan pa pasa un dia ameno na e sitio, pero e momento cu ta bandona e sitio, mester bay cu esakinan tambe, y laga e lugar limpi manera cu bo a haya.











**MINISTER ANDIN BIKKER**

MINISTER di Husticia, Seguridad y Migracion



# TA HACI EXCEPCION PA PERSONANAN CU NO POR HACI EXAMEN DI RIJBEWIJS DIGITAL Y RIJBEWIJS LO SER BUSCA NA CENSO



Actualmente por pasa examen di rijbewijs digital, despues cu gobierno a hereda un situacion unda tabatin lista largo di espera. Cu introduccion di rijbewijs digital un grupo grandi di persona por pasa e test mesun momento pero a bin constata cu tin persona cu no tin e habilidad pa pasa e rijbewijs digital. Minister Bikker teniendo cuenta cu e situacion a yega na un solucion pa esaki y 30 di december ultimo a introduci afkondigingsblad 2019/92 e posibilidad cu por tin excepcion pa esunnan cu no tin conocimiento of habilidad pa haci e examen

digital. E persona mester por mustra esaki y asina e por pasa su examen na e sistema tradicional. Cu test di rijbewijs digital e dilema di retraso ta pasa pa pasado.

Minister Bikker tambe a menciona dialuna den conferencia di prensa, cu den Consejo di Minister a dicidi pa loke ta trata dunamento di rijbewijs esta e documento esaki ta pasa pa Censo. Gobierno a dicidi cu Censo ta duna e documento pasobra por a constata cu tabatin fout y for di 2017 durante eleccion tabatin diferencia di opinion riba e tereno aki pasobra den yenamento di e nomber cu tabata bay na man tin biaha tabatin discrepancia. Si Censo mes traha riba e documento di rijbewijs e ora lo no tin discrepancia den esaki mas.

Los di esey a haya diferente reto momento cu a drenta gobernacion pasobra a bin resulta cu e gobierno anterior no a registra e rijbewijs internacionalmente. Tabatin persona cu a bay cu vakantie y nan tabata haya boet, no por a huur auto, pasobra e rijbewijs no ta registra. Na Juli 2018 algun ciudadano a haya confrontacion cu e situacion di rijbewijs y na Belgica nan a haya boet pasobra e rijbewijs no ta registra. Despues cu a bay dobel check ta resulta cu berdad e rijbewijs no ta registra den registro internacional y mesora a bay over pa haci esaki.

Fuera di tur e situacionnan aki, Minister Bikker a bisa cu a bin haya otro confrontacion cu el a yama tragico/comico pasobra un par di siman pasa, den cuadro pa transferi e dunamento di rijbewijs via Censo a haya reclamo di e compania. Compania cu ta provee e mashin di rijbewijs a bay registra e rijbewijs di Aruba na oficina di Propiedad Intelectual BIE y ta claim cu e diseño ta di nan. Minister Bikker a splica cu huridicamente a rechasa esaki pasobra pais Aruba a paga un suma grandi e tempo aya na 2015 di 53 mil florin pa diseño di e rijbewijs. Huridicamente a contesta e compania bisando cu el a wordo paga pa produci e diseño pa traha e rijbewijs door di pais Aruba cu ta e cliente. Segun hurisprudencia y tambe segun ley, pais Aruba tin e derecho pa sigui haci uzo di e diseño. Pero mientras tanto a dicidi cu ta bay laga diseñá un rijbewijs nobo pasobra ta busca solucion y no kier bay den polemica.



# TA BAYINTENSIVA CONTROL DI KPA RIBA PERSONANAN ILEGAL Y REINSTITUI VISIBILITY TEAM



Minister di Husticia mr. Andin Bikker ta lamenta e caso di atraco cu a tuma luga diasabra den area hotelero especificamente na Ritz Carlton unda a atraca un joyeria. Den un termino hopi cortico cuerpo policial tabata na e sitio mientras cu helicopter tabata patruya den e area. Minister Bikker a anuncia den conferencia di prensa di Gobierno dialuna, cu un sospechoso a keda deteni mientras cu e investigacion ta andando. E sospecho den e caso aki ta un ilegal di origen Venezolano. Di e cantidad di atraco a constata cu indice di atraco cu tabata 65 a baha na 34 y 13 di e sospechosonan ta di Venezuela. E

tendencia ey ta continua y den cuadro di esey a dicidi cu ta bay intensifica control di KPA riba personanan cu si nan tin status legal of no.

Na 2018 Minister Bikker a reinstitui pa KPA por controla personanan ilegal basa riba ley di admision y expulsion LTU y awor ta bay intensifica e control. Los di esey ta bin cu e ESTA, e sistema Mericano y Minister Bikker a añadi un dimension nobo na dje cu ta e APIS Advance Passenger Information System y tambe PNR cu ta e Passenger Name Record. Den e concept Landsbesluit cu a caba di finalisa, Minister Bikker a trece dilanti cu den e concepto tin algun punto interesante y uno di nan ta cu debi na e situacion den nos region ta bay institui e sistema aki electronico y asina por dicidi si ta bay otorga un cantidad limita di e ESTA pa por drenta Aruba.

Pa loke ta Visibility Team cu den e gobierno anterior a dicidi di no sigui cu ne, Minister Bikker a bisa cu ta bay reinstitui e team aki. Mayoria di e atraconan ta riba joyeria y esey ta pone cu mester concentra riba medida di seguridad pa loke ta diferente establecimiento. Minister Bikker ta haya cu mester conscientisa no solamente comercio pero henter pueblo cu seguridad ta un responsabilidad comparti. Den e caso pa loke ta trata joyerianan, a reuni cu nan conhuntamente cu AHATA pa wak kico ta e medidanan cu nan mes a pone y unda por mehora esaki y evita cu un of mas persona por yega na e idea di bay purba comete atraco.

Den mesun conferencia di prensa Minister Bikker a informa cu a detene un persona cu a pretende cu tabatin un atraco pero despues a resulta cu ta algo fingi. Esaki ta e caso cu a tuma luga prome cu Pasco na Noord. Tambe Minister Bikker a coregi locual a sali den prensa di e atraco na Ritz Carlton cu lo tabatin un of mas disparo, pero no tin ningun indicacion cu tabatin tiro pasobra no a haya nada di esey y ni informacion di testigo cu tabatin tiramento den e joyeria. Dialuna atardi ta drenta noticia di polis cu a bin haya e arma den Saliña. Atraco Team hunto cu un team di polis a busca den e area pariba di Ritz Carlton en busca di e joya nan y e arma di candela. E pistol cu a haya a keda confisca y entrega na e team forensico pa por haci su investigacion. Cuerpo Policial ta pidi ken cu por a wak algo of sa algo yama tiplijn di polis cu ta 11141.





**MINISTER DANGUI ODUBER**

MINISTER di Turismo, Salud y Deporte



# Minister Dangui Oduber AÑA 2020 LO BIRA OTRO AÑA RECORD DEN TURISMO CRUSERO TA PROYECTA PA SURPASA 840.000 TURISTA CRUSERO E AÑA AKI!

Minister Dangui Oduber ta sumamente contento y alavez orguyoso cu e resultadonan den turismo cu a wordo registra pa aña 2019 pa loke ta trata Turismo di nos pais. Turismo ta keda nos unico pilar economico y e driver principal di nos economia. Danki na turismo tin progreso economico y danki na turismo miles di persona na Aruba tin un entrada pa asina por mantene nan famianan. Aña 2018 caba e ser considera un di e mihor añanan di historia di Turismo pa nos pais. E cambio por wordo sinti den Turismo y tur e indicadornan ta papia pa nan mes. Turismo crusero a registra un aña record den aña 2018. Nunca antes den historia di pais Aruba e registra un cantidad di 815.161 pasahero crusero. Un aña sumamente exitoso pa Turismo crusero y mas cu logico esaki tambe a yuda contribui na nos economia.

Aña 2019 no tawata diferente y sigur aña 2019 a kibra otro record den cantidad di turista crusero. Pa aña 2019 APA NV a registra un cantidad di mas di 830.000 turista crusero y di e forma aki ta surpasa e record di bishitante di anja 2018 cu tawata 832.001. Sigur un otro logro grandi pa APA y tambe pa pais Aruba. No solamente turismo crusero sino tur e otro indicadornan di turismo ta positivo pa aña 2019.

Na momento cu tin otro aña exitoso asina esaki ta wordo sinti tambe pa tur esnan den e sector turistico. Turismo crusero ta contribui na un manera positivo na e entradanan cu ta wordo genera pa cada turista crusero.

Aña 2020 lo bai bira un aña cardinal pa APA NV caminda tin varios desaroyonan grandi cu lo cuminsa. Tin e Proyecto di Port City cu lo bira un masterplan caminda lo tin un inversion di mas di \$500 miyon di sector priva. APA lo inverti den upgrading di facilidadnan y asina percura pa por brinda un mihor servicio na nos bishitantenan. Den 2020 tambe ta importante pa menciona cu pa promer vez Aruba lo ricibi e crusero di Ritz Carlton. E crusero luhoso a pone Aruba riba su itinerario y esaki ta demostra e calidad di producto Aruba.

Minister Dangui Oduber kier a gradici gerencia, staff y personal



di APA NV pa e tremendo resultadonan aki. Tambe un palabra di gratitud pa ATA y tur cu a contribui y haci posibel pa tin un otro aña record den Turismo crusero.

Tur e indicadornan di Turismo ta positive y esaki ta muestra cu e maneho di minister Dangui Oduber ta dunando resultado. Pa 2 aña consecutivo tin crecemento riba crecemento cual ta un señal sumamente positivo pa nos Turismo.

Turismo ta keda e driver principal di nos economia y ta keda demostra cu echonan con exitoso esaki ta den e periodo di gobernacion aki.





**FORMACION SOCIAL**

**TRAYECTO LO CUMINSA**  
**25 februari 2020**

# INSCRIBI AWO!

Bo oportunidad pa haci un cambio positivo den bida



GOBIERNO DI ARUBA



## UNDA MI POR INSCRIBI?

Oficina di Formacion Social  
Marinierskazerne Savaneta  
Bureau Sociale Vorming  
Tel: 522-5352  
Sra. Jessica Ras  
info.formacionsocial@gmail.com

## KI DIA MI POR INSCRIBI?

**AWO CABA**

## FORMACION SOCIAL TA ALGO PA BO?

Bo ta un hoben masculino entre 18 y 24 aña?  
Bo no a termina un scol secundario?  
Bo kier mehora bo oportunidad pa trabou?  
Bo kier un cambio positivo den bo bida?  
Bo a termina un scol secundario y ta sin trabou?



Bishita nos na: Formacion Social - SVT

GABINETE WEVER-CROES



GOBIERNO DI ARUBA

ISLA(ONLINE)

## RESUMEN 2019

UN AÑA DI RETONAN PERO CU HOPI LOGRO GRANDI

2019 tabata un aña cu varios reto, algun reto hopi serio. Gobierno a declara Aña 2019 como Aña di Famia y Cuido di Nos Muchanan, den cual a pone e ser humano central. Gobierno a realisa na mes momento cu pa logra esaki, mester a atende cu diferente reto hibando un maneho mas prudente y den e espacio limita cu Gobierno tawatin, semper a pone e ser humano central.

Ta asina Gobierno a logra pa meintres nos ta solucionando tur e problemanan di nos pais, pa duna alivio na nos ciudadanonan, logrando cosnan grandi na bienestar y progreso pa nos pueblo, cu e meta principal pa sania e problema financiero di Aruba y entrega un miho Aruba na nos futuro generacionnan.

## JANUARI

- Poniendo e ser humano central y pone mas enfasis riba cada persona cu ta biba riba nos isla, Gobierno a declara 2019 como Aña di Famia y Cuido di nos Muchanan. Diferente evento y conferencianan a wordo plania durante aña pa duna enfoke riba e famia.

- Reforma fiscal a trece alivio pa nos pueblo: 30 mil hende NO ta paga belasting riba entrada mas; 25 mil hende a mira un rebaho; 12 mil hende no ta paga Grondbelasting mas.

- Nos grandinan a haya aumento di Pensioen di Biehes.

- Reparatieoeslag a subi cu 25 florin.

- Premie AZV a baha di 10.5% pa 6.5%.

- Gobierno a amplia canasta basico di 11 pa 22 categoria. 1200 producto ta wordo controla.

- A anuncia moratorium riba supermercado, no mas supermercado.

## FEBRUARI

- Gobierno a presenta e proyecto "From Good to Great". Un proyecto exitoso pa guia nos hobennan y motiva nan pa nan ta exitoso den bida. E Proyecto a inclui mas di 500 hoben kendenan a expresa nan satisfaccion cu e programa.

- Venezuela a tuma e desicion unilateral pa cera frontera maritimo y aereo entre Venezuela y Aruba. Un desicion cu tawata tin un impacto riba e relacion especialmente familiar entre e dos paisnan. Gobierno di Aruba ta hopi cauteloso cu habrimento di frontera bek teniendo cuenta cu e crisis migratorio di Venezuela.

- Creando oportunidad pa varios famia na Aruba pa bin na nan propio cas, un cantidad grandi di tereno a wordo otorga hibando un maneho structural riba terenonan disponibel.

- Varios caretera den mal estado rond nos isla a wordo asfalta. Un bon comienso pa e lunanan cu a sigui pa drecha nos carteranan y mehora infraestructura den otro barionan.

- Turismo ta sigui crece cu un grado di ocupacion di 89.5% cu tawata un grado di ocupacion mas halto den henter Caribe.

- A anuncia proyecto di airco y digitalisacion di Cacique Macuarima cu ta e scol piloto pa innovacion den enseñansa.

## MAART

- SISSTEM: Sustainable Island Solutions through Science Engineering Technology Mathematics. Aruba ta haya 13.05 milyon Euro for di Fondo di Desaroyo Europeo pa realisa e proyecto aki. E no ta un fianza, sino un regalo pa nos Pais.

- Teniendo cuenta cu e situacion dificil di Venezuela y e impacto di e crisis migratorio, Gobierno di Aruba a tuma e decision pa intensiva control na nos frontera.

- Trece bek e helicopter pa un Aruba mas sigur, desde comienso di gobernacion tawata un prioridad pa Gabinete Wever-Croes. E helicopter a reforsa nos Cuerpo Policial y tambe control di nos costanan.

- Innova enseñansa ta primordial pa tur pais. Aruba no a keda atras. Gobierno a introduci e Plan Educacional Nacional 2030 (PEN), mustrand cu e maneho mester ta di largo plazo y cu continuidad den mehoracion di educacion.

- IMF a duna un evaluacion positivo di Aruba. Esaki ta e di resultado di bon gobernacion y maneho financiero di Gabinete Wever-Croes. E caminda ta largo y dificil pero ora nos haya un noticia asina, ta muestra cu nos ta riba bon caminda.



## APRIL

• Gabinete Wever-Croes a presenta su Vision Economico 2019-2022 cu no solamente ta dirigi riba crecimiento economico, pero mas bien riba crecimiento di calidad di bida di nos ciudadanonan.

• Parke Marino ta ser anuncia. “E bida bou di lama ta hopi importante, pero tambe hopi fragil”. Pa pueblo di Aruba esaki ta significa cu ta proteha y conserva e Aruba cu nos conoce pa Futuro generacionnan.

• A tuma luga e prome Congreso Tripartiet Social Laboral y tawata tin como topico e ley di ARBO. Gobierno su meta ta pa esaki bira un plataforma permanente di dialogo unda cu den esfuersonan conhunto por determina e futuro di nos Pais cu ta carga sosten di tur partner.

## MEI

• Salario minimo a aumenta cu 3% dia 1 di mei, a base di consehonan di Sociaal Economische Raad SER, den cual tin representacion di gremio sindical y gremio comercial.

• Banco Central ta lansa florin nobo cu tema “bida na Aruba” y esaki ta wordo nomina pa “Banknote of the Year 2019 award”.

• E prome edicion di Island Fest. Pa sostene e maneho di Turismo terciendo turistanan di calidad, a crea Island Fest. Island Fest lo organisa 1 evento pa luna den e districto di San Nicolas. Cu e introduccion di e Island Fest nos hendenan local lo traha pa promove pais Aruba den un forma simpel pero amistoso y yen di ambiente. E prome festival a surpasa 7000 hende.

• Hulanda a compromete cu 23.8 milyon Euro pa e islanan Hulandes den Caribe atende cu e impacto di e crisis di Venezuela. E placa ta wordo uza pa entre otro mas control di frontera, mas capacidad y expertisio pa atende tur e peticionnan di asilo, mas asistencia den mantene orden den nos pais, y gastonan relaciona cu e fluho grandi di migracion cu nos ta mira na nos isla.

• Parlamento di Aruba unanimamente ta aproba y sostene ley nobo di destaho publico. E ley di destaho publico a pasa mustrand cu den e gobernacion aki si tin curashi, transparencia y integridad pa trata y aproba e ley aki.

• Tur peticion di tereno pendiente desde 2005 te cu 2018 a wordo atendi. Mas ciudadano ta haya e oportunidad pa construi nan cas mas lihe.

• Gobierno a ricibi mas entrada y a logra baha su gastonan y esaki a produci un surplus di casi 7 milyon florin. E debe nacional a baha di 77.8 pa 77.3%. Gabinete Wever-Croes cu pasonan firma ta transformando mal gobernacion den bon gobernacion bahando nos debe nacional.

• Olimpiada Escolar ta bek despues di 8 aña. Minister Dangui Oduber a haci tur esfuerso pa percura cu esaki bira posibel. Diabierna ultimo tawata tin e apertura oficial. Den total 1700 mucha di 42 scol a participa na e competencia escolar aki. Asina Gabinete Wever-Croes kier stimula.

• Gobierno a firma MOU cu Wayne State University na Nebraska, pa asina nos studiantenan por haya tarifa local y por studia cu un Arubalening na Nebraska, creando asina mas oportunidad pa nos hobennan.

• Despues cu Gobierno di Aruba a ricibi e notificacion oficial di Gobierno di Venezuela cu nan a habri e frontera entre Venezuela y Aruba, Gobierno di Aruba a decreta cu Aruba ta cera frontera cu Venezuela pa un periodo di un (1) luna. Mirando e situacion di crisis sin precedente cu e pais bisiña ta pasando den dje cu un aumento di migracion cu por tin efectonan pa cu orden publico y seguridad di Aruba, Gobierno di Aruba tin interes general di nos pueblo como prioridad.

## JUNI

• Rapport di IMF a wordo publica. E evaluacion positivo di IMF, hunto cu e proyeccionnan positivo cu IMF a haci, ta muestra di confiansa cu poco poco pero sigur Gobierno di Aruba ta ganando e confiansa bek den nos pais.

• Plan Nacional pa atende cu cachonan di caya porfin ta bira realidad. Despues cu e ley di cacho a pasa 5 aña pasa, awor tin un maneho structural.

• Futura a introduci e weganan di mesa di SDG's na diferente scol. E weganan aki ta siña muchanan tocante e 17 Metanan di Desaroyo Sostenibel cu Nacionnan Uni a stipula pa 2030 pa crea un miho mundo.

• Minister President a firma un MoU cu Stichting Deugdelijkheid van Bestuur pa haci un National Integrity System Assessment (NIS-A). E gastonan lo wordo carga hunto door di Gobierno di Aruba, Sector Priva y Gobierno di Hulanda. Esaki ta un iniciativa di SDBA lansa durante e ultimo simposio di SDBA. Sector priva y sector publico ta uni forsa pa combati corrupcion!

• Gobierno ta sigui inverti den ekipo pa Polis y KIA.

## REBAHO DI CORIENTE

ENTRANTE JANUARI 2020

DOMESTICO

10%

FUNDACION  
MISA  
SCOL

9%

COMERCIO

7%

*Drentando e decada nobo cu prosperidad pa tur!*

GABINETE WEVER-CROES



## JULY

• A introduci e asina yama "Schipholmodel", caminda lo evalua e peticionnan di asilo rapidamente y mientras lo por retene aplicantenan durante dicho periodo den cuadro di screening pa seguridad, orden y salubridad publico.

• Minister di Labor ta entrega Minister President e rapport di labor unda ta confirma cu desempleo ta baha di 8.9% pa 7.3%. E señal cu maneho di Gobierno anti ontheffing y pro nos trahadonan local ta dunando resultado positivo. Esaki ta un otro muestra di un maneho responsabel y structura.

## AUGUSTUS

• Standard & Poors a "upgrade" Aruba cu pronostico di negativo pa stabil. Esaki ta resultado di trabou duro di tanto Gobierno y tur esnan cu ta traha den e departamentonan concerni.

• E maneho di Gabinete Wever-Croes pa pone innovacion como un punto di salida pa garanisa integridad y transparencia poco poco ta birando realidad. Den esfuerzo pa logra e-Government y digitalisacion, Consejo di Minister a tuma e decision pa Aruba tambe bay over na votacion digital y electronico ya pa e siguiente eleccion.

• Bureau Integridad Aruba, BIA a cuminsa cu campaña di conscientisacion. BIA su so no por crea un aparato gubernamental ni un comunidad integro. Tur sector di comunidad tin e responsabilidad pa preveni y combati corrupcion.

• Gobierno di Aruba ta Modernisa direccion di asuntonan di telecomunicacion. (DTZ)

• Arubus ta pone 8 bus nobo riba caminda pa nos ciudadanonan.

• Reconocimento na un gran politico y gobernante. Gobierno di Aruba ta Inaugura Avenida Nelson Orlando Oduber.

• Gobierno di Aruba ta sostene e prome San Nicolas Business Summit "The Time is Now". Hunto nos mester traha den e direccion pa crea oportunidad na San Nicolas pero especialmente PA San Nicolas y crea un miho ARUBA.

• Gobierno di Aruba ta bay traha di cerca cu Ministerio di Defensa di Hulanda den e proyecto piloto: 'WERVEN IN HET WEST' pa duna nos hobennan na Aruba un oportunidad na Hulanda pa posibel careranan den Landmacht, Luchtmacht, Marine y Koninglijke Marechaussee.

• Gateway 2030 a yega su punto di mas halto di construccion, e proyecto di renobacion y ampliacion di nos aeropuerto. Cu un inversion di \$275 mion, Gateway 2030 lo crea mas cu 400 cupo di trabou pa nos hendenan, e lo stimula nos economia, contribui na nos GDP y contribui na finanzas di Gobierno di Aruba.

## SEPTEMBER

• Radisson Blu ta confirma su confiansa den economia y Turismo di Aruba. Radisson Blu Hotel ta un proyecto grandi cu un inversion di mas o menos 80 mion dollar cual lo tin un impacto sumamente positivo pa Aruba su economia.

• Gobierno di Aruba ta habri un Dependence Colegio San Nicolas na Dakota.

• A restructura e departamento di Social Psyciatrische Dienst (SPD) unda lo bin cu mas profesional pa yuda nos comunidad riba e problema di salud mental y adiccion a traves di "fact team".

• A establece base pa desaroya di Aruba un "hub" den Bon Gobernacion pa combati corrupcion den paisnan chikito.

• Re-apertura di Scol Scucha Nos.

• Stichting Leerorkest Aruba a wordo funda cu e meta pa tur mucha na scolnan basico, specialmente esnan di menos recurso, haya les di musica.

• Director di Departamento di Finansa a haci entrega di e Cuenta Anual di Pais Aruba pa 2018 na Minister di Finansa. Den e Cuenta Anual por mira cu Gobierno a cumpli cu e norma di deficit den 2018, ya cu e deficit a baha compara cu 2017. Den 2018 e crecimiento di debe tambe a keda estabilisa.

## OCTOBER

• Apertura di cas pa mamnan hoben na Casa Cuna unda un mama hoben, en bes di laga su baby na Casa Cuna su so, ta haya un luga pa e biba temporalmente cu su baby y haya guia y sosten pa e bira un bon mama pa su yiu.

• Logrando e vision di digitalisacion di Gabinete Wever-Croes, Ministerio di infraestructura a bay totalmente digital.

• Board Walk Malmok ta yegando su fase final pa asina nos local y turistanan por cana, core, haci ehercicio mientras ta contempla nos bunita naturalesa.

• Gobierno di Aruba ta firma di MoU cu Citgo pa cuminsa busca otro operador pa nos refineria.

• Hyatt Place na Airport ta haci su apertura asina contribui na economia y turismo di nos pais.

• A entrega e e prome fase di trabounan di edificio di Bestuurskantoor cu a wordo restaura como monumento den su gloria original. Esaki ta nos legado pa nos futuro generacionnan.

• Prome Minister Evelyn Wever-Croes a ribici for di man di Parlamentarionan Edgard Vrolijk, Rocco Tjon y Endy Croes un copia di e Ley di Iniciativa pa regla integridad di mandatarionan.

• E prome mast pa e sistema di radar pa KPA a keda lanta na Warda di Polis na San Nicolas.

• Trabounan riba Arubig ta continua pa asina pronto nos studiantenan den region por traha na Aruba.

**ENTRANTE**

**JANUARI 2020**

**PENSIOEN**

**DI BIEHES**

**TA SUBI**

• PAREHA CASA

**42** FLORIN PA LUNA

• SOLTERO

**25** FLORIN PA LUNA



• Minister di Energia ta organisa e Energy summit pa defini un maneho nobo y structura.

• Proyecto Ban Lanta y Planta ta ser introduci na diferente scol.

• Setar ta sigui cu e vision di Gabinete Wever-Croes den innovacion y ta introduci Pay.aw.

• Maneho di Parke Marino a wordo traspasa pa Parke Arikok.

• Fase 1 di Proyecto Carnival Village ta ser entrega.

## NOVEMBER

• Pa prome biaha den historia di Aruba, Consejo di Minister a reuni na San Nicolas. Riba agenda tabata tin temanan cu ta relata na bienestar y progreso di San Nicolas.

• Gobierno di Aruba hunto cu San Nicolas Business Association a tene un conferencia di prensa na San Nicolas pa duna un relato amplio di desaroyo, logro y plannan di y pa San Nicolas.

• E di dos 'German Energy Conference' na Aruba. Hunto cu stakeholders, Gobierno ta trahando pa desaroya e vision y maneho nobo di energia.

• Minister di Cultura ta haci Re-apertura di Museo Arceologico Nacional Aruba, MANA, despues di varios aña cera.

• Gobierno di Aruba ta anuncia cu desde 1 January 2020 ArubaLening ta bira 0% pa nos studiantenan.

• Groundbreaking hotel Secrets Baby Beach na San Nicolas ta tuma luga. San Nicolas tambe merece di ta parti di e progreso di nos pais.

**PRESUPUESTO  
2020**

**SURPLUS DI  
0.5% GDP**  
MANERA PALABRA!

• Apertura di proyecto Boardwalk Boutique Hotel. Un bunita propiedad cu ta cuadra cu e vision di desaroyo di Boutique. E proyecto aki ta uno di calidad y sigur ta un diversificacion pa nos turismo.

• United Nations Women a bin Aruba pa yuda cu e gender beleid y a reuni cu tur stakeholders. A firma e MoU cu UN Women. UN lo yuda cu e maneho di genero pa brinda mas proteccion y crea oportunidadnan igual pa e hende homber y hende muhe.

• Gobierno di Aruba ta atende cu Conferencia di Interpol "Cybercrime Capacity Building Project in the Americas".

• Ley di prohibicion di articulo di plastic di un solo uzo Styrofoam y oxybenzone a pasa den Parlamento.

Gobierno di Aruba ta haci Groundbreaking Baby Beach Waterfront na San Nicolas.

## DECEMBER

• Minister di Labor ta organisa e di dos Congreso Tripartite Social Laboral pa yega na acuerdo riba e ley di Arbo.

• Otro Hotel ta habri na Aruba Courtyard Marriott.

• Gobierno di Aruba ta anuncia e rebaho di prijs di coriente cu 10% pa casnan, 9% pa misa y fundacionnan y 7% pa comercio.

• Imsan ta sigui cu expansion y ta haci e prome operacion di catarata.

• Den Ministerraad a ser aproba e ley di Bureau Integriteit.

• Diferente scol ta ricibi digiboards. Innovacion ta e direccion cu nos ta bayendo y poco poco tur scol na Aruba lo ricibi digiboards.

• Gobierno di Aruba ta introduci un maneho mas estricto contra abuso contra animal.

• Gobierno ta entrega na Parlamento e presupuesto supletorio 'budget neutral'.

• Minister di Salubridad ta anuncia cu pensioen di biehes ta aumenta entrante 1 di januari 2020.

• Impuesto riba entrada ta baha pa tur hende entrante 1 di januari 2020 pa acapara e aumento di costo di bida.



GOBIERNO DI ARUBA

## CANASTA BASICO

GOBIERNO  
TA AMPLIA  
CANASTA  
BASICO

DI **11** PA  
**22**  
CATEGORIA

**1200**  
PRODUCTO  
PRIJS TA WORDO  
CONTROLA

1. Sucu
2. Cuminda pa Baby
3. Koffie
4. Hariña di maishi
5. Margarina den paki of bleki
6. Lechi likido pa koffie
7. Lechi pa baby
8. Manteca di paki of bleki
9. Aros blanco y bruin
10. Azeta pa cushina: Azeta di olijf, Zonnebloem, Canola of maishi
11. Te preto y te berde
12. Papa haverhout (Quacker)
13. Pasta, spaghetti
14. Hariña blanco di trigo
15. Bonchi cora seco
16. Bonchi preto seco
17. Bonchi lima seco
18. Tunafish den bleki (den awa, chunk, flaked, grated),
19. Sardin den bleki (den awa),
20. Salmou den bleki (den awa),
21. Lechi likido duradero den tetrapak of boter
22. Berdura: Brocoli frozen, Spinashi frozen y mixed vegetable frozen.

GABINETE WEVER-CROES  
**TA PRIMINTI Y TA CUMPLI**





GOBIERNO DI *ARUBA*

*un  
Feliz Dia*

ISLAONLINE  
PA INFORMACION  
CORECTO Y BERDAD